

"Заңсыз еңбек мигранттарын заңдастыру туралы" Қазақстан Республикасы Заңының жобасы туралы

Қазақстан Республикасының Үкіметінің 2006 жылғы 26 мамырдағы N 457 қаулысы

Қазақстан Республикасының Үкіметі **ҚАУЛЫ ЕТЕДІ:**

"Заңсыз еңбек мигранттарын заңдастыру туралы" Қазақстан Республикасы Заңының жобасы Қазақстан Республикасының Парламенті Мәжілісінің қарауына енгізілсін.

Қ а з а қ с т а н Р е с п у б л и к а с ы н ы ң

Премьер-Министрі

жоба

ҚАЗАҚСТАН РЕСПУБЛИКАСЫНЫҢ ЗАҢЫ

Заңсыз еңбек мигранттарын заңдастыру туралы

Осы Заң мемлекеттің Қазақстан Республикасының аумағында еңбек қызметін жүзеге асыратын заңсыз еңбек мигранттарын ішкі істер органдарында тіркеу жолымен заңдастыру жөнінде бір жолғы акция өткізуін реттейді.

1-бап. Заңның қолданылу аясы

1. Заңдастыру осы Заңның қолданысқа енгізілуінен үш ай бұрын Қазақстан Республикасына келген және осы уақыттан бастап Қазақстан Республикасының аумағына келіп жатқан әрі уәкілетті органның рұқсатынсыз еңбек қызметін жүзеге асырып жатқан Тәуелсіз Мемлекеттер Достастығына қатысушы мемлекеттердің азаматтарына қатысты жүзеге асырылады.

2. Осы Заң осы баптың 1-тармағында көрсетілген адамдардың еңбегін пайдаланатын Қазақстан Республикасының жеке және заңды тұлғаларына қ о л д а н ы л а д ы .

3. О с ы З а ң н ы ң ә р е к е т і :

Қазақстан Республикасына қолданыстағы заңнаманы бұза отырып келген; Қазақстан Республикасында болу құқығына жарамды құжаттары жоқ; өзі туралы жалған мәліметтер берген немесе қажетті құжаттарды ұсынбаған шетел азаматтарына қолданылмайды.

2-бап. Заңсыз еңбек мигранттарын заңдастыру мерзімі

Заңсыз еңбек мигранттарын заңдастыру 2006 жылғы 1 тамыздан бастап 2006 жылғы 31 желтоқсанды қоса алғанда жүргізіледі.

3-бап. Заңсыз еңбек мигранттарын заңдастыру тәртібі

1. Заңсыз еңбек мигранттарын заңдастыруды осы Заңның 1-бабының 1-тармағында көрсетілген шетел азаматтарының еңбегін пайдаланатын жұмыс беруші оларды ішкі істер органдарында еңбек мигранттары ретінде тіркеу арқылы жүргізеді.

2. Заңсыз еңбек мигранттарын заңдастыру үшін жұмыс берушілер еңбек қызметін жүзеге асыратын жері бойынша ішкі істер органдарына еңбек мигранттарын тіркеу туралы өтініш береді.

Өтініште:

1) жұмыс беруші туралы деректер:
жеке адамның тегі, аты, әкесінің аты немесе заңды тұлғаның атауы;
жеке адамның жеке басын куәландыратын құжаттың немесе заңды тұлғаны мемлекеттік тіркеу туралы куәліктің нөмірі және берілген күні;
жеке адамның тұрғылықты жері немесе заңды тұлғаның орналасқан жері,
салық төлеушінің тіркеу нөмірі;

2) еңбек мигранттары ретінде тіркелетін шетел азаматтары туралы деректер:
тегі, аты, әкесінің аты;
азаматтығы;

Қазақстан Республикасында уақытша болатын мекен-жайы көрсетіледі.

Өтінішке:

Қазақстан Республикасының заңнамасында және Қазақстан Республикасы бекіткен халықаралық шарттарда белгіленген тәртіппен жасалған жеке еңбек шартының көшірмесі;

шетел азаматтарының жеке басын куәландыратын құжаттары және көші-қон карточкалары қоса беріледі.

3. Тіркеу туралы өтініш берілген күнінен бастап бес жұмыс күні ішінде қаралады.

4. Осы Заңда белгіленген талаптар сақталған кезде ішкі істер органдары ерекше үлгідегі көші-қон карточкасын бере отырып, шетел азаматын тіркеуді жүргізеді.

5. Жұмыс беруші және еңбек мигранттары ретінде тіркелген шетел азаматтары туралы мәліметтерді тіркеуді жүзеге асырған аумақтық ішкі істер органы заңдастырылған еңбек мигранттарының тізіліміне енгізеді.

Заңдастырылған еңбек мигранттары тізілімінің көшірмелері жергілікті атқарушы органдарға жіберіледі.

Ерекше үлгідегі көші-қон карточкасының нысаны мен оны беру тәртібін, сондай-ақ заңдастырылған еңбек мигранттары тізілімінің нысаны мен оны жүргізу тәртібін заңсыз еңбек мигранттарын тіркеуді жүзеге асыратын орталық атқарушы орган белгілейді.

6. Осы Заңда белгіленген талаптар сақталмаған жағдайда тіркеуден бас тарту себептері көрсетіле отырып, өтініш қайтарылуы тиіс.

Өтінішті қайтаруға негіз болған себептер жойылған кезде тұлға заңсыз еңбек мигранттарын заңдастыру туралы өтінішті заңдастыру мерзімі ішінде қайта беруге құқылы.

7. Жұмыс берушілер осы Заңның 1-бабының 1-тармағында көрсетілген адамдардың еңбегін олар ішкі істер органдарында тіркелген күнінен бастап пайдалануға құқылы.

8. Осы Заңның 1-бабының 1-тармағында көрсетілген адамдар тіркелген күнінен бастап тіркеу үшін ұсынылған жеке еңбек шартының қолданылу мерзімі ішінде, бірақ оны жасасқан күннен бастап үш жылдан аспайтын мерзімде Қазақстан Республикасының аумағында еңбек қызметін жүзеге асыра алады.

4-бап. Әкімшілік жауапкершіліктен босату

Осы Заңның 1-бабының 1, 2-тармақтарында көрсетілген адамдар Қазақстан Республикасы Әкімшілік құқық бұзушылық туралы кодексінің 394, 395 (бірінші бөлігі), 396-баптарында көзделген әкімшілік жауапкершіліктен босатылады.

5-бап. Қылмыстық жауапкершіліктен босату

Осы Заңның 1-бабының 2-тармағында көрсетілген адамдар Қазақстан Республикасы Қылмыстық кодексінің 330-3-бабында көзделген қылмыстық жауапкершіліктен босатылады.

6-бап. Осы Заңның қолданысқа енгізілу тәртібі

Осы Заң ресми түрде жарияланған күнінен бастап он күнтізбелік күн өткен соң қолданысқа енгізіледі.

Қ а з а қ с т а н Р е с п у б л и к а с ы н ы ң

Президенті